

重修棗陽縣志卷之八

人物

光武帝紀 光武宗室勲戚王侯傳 名人列傳
孝義忠勇列傳 流寓列傳

光武帝紀

漢世祖光武皇帝諱秀字文叔南陽蔡陽人高祖九世孫也
出自景帝生長沙定王發發生春陵節侯買買生鬱林太守
外外生鉅鹿都尉回回生南頓令欽欽生光武帝帝年九歲
而孤養於叔父良身長七尺三寸美鬚眉大口隆準日角性
勤稼穡而兄續好俠養士常非笑帝事田業比之高祖兄仲
王莽天鳳中廼之長安受尙書略通大義莽末天下連歲災

重修棗陽縣志

卷之八

帝紀

一

蝗寇盜蜂起地皇三年南陽荒饑帝因賣穀於宛宛人李通
等以圖讖說帝云劉氏復起李氏為輔帝遂與定謀十月與
通從弟軼等起於宛時續已會眾起兵進拔棘陽帝族兄劉
元由平林軍椽號更始將軍與王莽前隊大夫甄阜屬正梁
邱賜戰於小長安漢軍大敗還保棘陽四年正月復與甄阜
梁邱賜戰於泚水西大破之斬阜賜又破王莽納言將軍嚴
尤秩宗將軍陳茂於清陽進圍宛城二月共推劉元為天子
建元更始元年以續為大司徒帝為太常偏將軍三月帝別
與諸將徇昆陽定陵鄧皆下之莽遣其大司徒王尋大司空

王邑將兵百萬五月到潁川復與嚴尤陳茂合帝將數千兵
徼之於陽關諸將見尋邑兵盛反走馳入昆陽帝爲圖畫成
敗諸將憂迫皆曰諾時城中唯有八九千人帝迺使王鳳王
常畱守夜自與十三騎出城收兵時莽軍到城下者且十萬
圍之數十重列營百數王鳳等乞降不許六月己卯帝遂與
營部俱進自將步騎千餘前去大軍四五里而陳尋邑亦遣
兵數千合戰帝擊之斬首數十級尋邑兵卻諸部共乘之莽
兵大潰帝因復徇下潁陽會續爲更始所害帝自城父馳詣
宛更始拜帝爲破虜大將軍封武信侯九月三輔豪傑共誅

重修棗陽縣志

卷之八

帝紀

二

王莽傳首詣宛更始將北都洛以帝行司隸校尉使前整修
宮府時三輔吏士東迎更始見司隸僚屬皆歡喜不自勝由
是識者皆屬心焉更始至洛陽迺遣帝以破虜將軍行大司
馬事持節北渡河鎮慰州郡故趙繆王子林詐以卜者王郎
爲成帝子子輿立爲天子都邯鄲二年帝進圍邯鄲五月拔
其城誅王郎更始進帝爵爲蕭王悉令罷兵詣行在所帝辭
以河北未平不就徵自是始貳於更始當是時長安政亂四
方叛賊銅馬大彤高湖重連鐵脰大鎗尤來上江青犢五校
檀鄉五幡五樓富平獲索等眾合數百萬人所在寇掠帝北

發十郡兵擊銅馬於鄒悉破降之將降人分配諸將眾遂數十萬故關西號帝爲銅馬帝青犢赤眉賊入函谷關攻更始帝廼遣鄧禹引兵西以乘更始赤眉之亂更始使朱鮪李軼等屯洛陽帝亦令馮異收孟津以拒之帝北擊尤來大槍五幡於元氏追至右北平連破之大軍復進至安次與戰賊入漁陽廼遣吳漢率耿弇陳俊馬武等十二將軍追戰於潞東及平谷大破滅之於是諸將議上尊號帝不從行到南平棘諸將固請帝曰吾將思之行至鄗羣臣因復奏曰受命之符人應爲大今上無天子海內淆亂符瑞之應昭然著聞宜答重修棗陽縣志

卷之八

帝紀

三

天神以塞羣望於是命有司設壇於鄗南六月己未卽皇帝位建元爲建武大赦天下冬十月車駕入洛陽遂定都焉在位三十三年以中元二年崩壽六十二

東漢王侯勲戚列傳

趙孝王劉良字次伯光武帝之叔父也帝兄弟少孤良撫循甚篤及帝起兵以事告良良大怒曰汝與伯升志操不同今家欲危亡而共謀反耶不得已從軍至小長安漢兵大敗良妻及二子皆遇害更始立以良爲國三老從入關更始敗良聞帝卽位乃亡奔洛陽建武二年封爲廣陽王五年徙爲趙

王始就國十三年降爲趙公頻歲來朝廿年薨于京師凡立十六年子節王栩嗣建武三十年封栩三子爲鄉侯建初二年復封栩子爲亭侯栩立四十年薨子頃王商嗣永元三年封商三弟爲亭侯元興元年封商四子爲亭侯商立二十三年薨子靖王宏立十二年薨子惠王乾嗣

泗水王劉歙字經孫光武帝族父也歙子終與帝少相親愛漢兵起始及唐子鄉終誘殺湖陽尉更始立歙從入關封爲元氏王終爲侍中更始敗歙終東奔洛陽建武二年立歙爲泗水王終爲淄川王十年歙薨封少子燁爲堂谿侯奉歙後

重修棗陽縣志

卷之八

勳戚王侯傳

四

終居喪思慕哭泣二十餘日亦薨封長子柱爲邛侯以奉終祀又封終子鳳曲陽侯歙從父弟茂年十八漢兵之起茂自號劉失職亦聚眾京密間稱厭新將軍攻下潁川汝南眾十餘萬光武旣至河內茂率眾降封爲中山王十三年宗室爲王者皆降爲侯更封茂爲穰侯茂弟匡亦與漢兵俱起建武二年封宜春侯爲宗正子浮嗣封朝陽侯浮弟尙永平中爲征西將軍浮傳國至孫護無子封絕

齊武王劉纘字伯升光武之長兄也莽末伯升發春陵子弟合七八千人部署賓客自稱柱天都部使宗室劉嘉往誘新

市平林兵王匡陳牧等推其族兄劉元爲更始將軍合軍而進至小長安與王莽前隊大夫甄阜屬正梁邱賜戰大敗還保棘陽於是大饗軍士休卒三日明旦漢軍攻甄阜遂斬阜賜續進共宛自號柱天大將軍王莽素聞其名大震懼購續邑五萬戶黃金十萬斤位上公自阜賜死後百姓日有降者衆至十餘萬諸將會議立劉氏以從人望豪傑咸歸於續而將帥憚其威明貪更始懦弱圍定策立之更始既卽位拜續爲大司徒封漢信侯由是豪傑失望五月續拔宛六月帝破王尋王邑自是兄弟威名益甚更始君臣不自安遂共謀續

重修棗陽縣志

卷之八

勳戚王侯傳

五

乃大會諸將以成其計更始取續寶劍視之繡衣御史申屠建隨獻玉玦更始竟不能發宗人劉稷聞更始立怒曰本起兵圖大事者伯升兄弟也今更始何爲者更始君臣愈忌之以稷爲抗威將軍稷不肯拜更始乃先收稷將誅之續固爭李軼朱鮪因勸更始并執續卽日害之有二子章興建武二年立章爲太原王興爲魯王十一年徙章爲齊王十五年追謚續爲齊武王章少孤帝撫育恩愛甚篤以其少貴欲令親吏事使試守平陰令遷梁郡太守立二十一年薨謚曰哀三子塲王石嗣建武二十七年石始就國三十年封石弟張爲

下博侯永平十四年封石二子爲鄉侯石立二十四年薨子
晃嗣下博侯張以善論議十六年與奉車都尉竇固等同出
擊匈奴後進者多害其能數被譖訴建武中卒肅宗下詔褒
揚之復封張子它人奉其祀晃及弟利侯剛與母太姬宗更
相誣告章和元年有司奉請免晃剛爵爲庶人徙丹陽帝不
忍貶晃爵爲蕪湖侯削剛戶三千遣謁者收晃及太姬璽綬
晃立十七年而降爵晃卒子無忌嗣帝以伯兄首創大業而
後嗣罪廢心常愍之時北海亦絕無後及崩遺詔令復二國
永元二年乃復封無忌爲齊王是爲惠王立五十二年薨子

重修棗陽縣志

卷之八

勳戚王侯傳

六

承嗣建安十一年國除

北海靖王劉興齊武王次子建武二年帝封興爲魯王嗣仲
兄十五年試守緱氏令有明畧善聽訟遷宏農太守多善政
視事四年徵還京師徙爲北海王顯宗器重興每有異政輒
乘驛問焉立三十九年薨諡曰靖子睦嗣睦少好學博通書
傳帝愛之數被延納顯宗在東宮侍諷誦尤見親信性謙恭
好士聲價益廣永平中法憲頗峻乃謝絕賓客放心音樂歲
終遣人奉璧朝賀召而謂之曰朝廷設問寡人大夫將何辭
以對使者曰大王忠孝慈仁敬賢樂士臣雖螻蟻敢不以實

奏睦曰吁子危我哉此乃孤幼時進趣之行也大夫其對以孤襲爵以來志意衰惰聲色是娛犬馬是好使者受命而行其能屈伸若此初靖王薨睦悉推財產與諸弟雖王車服珍寶皆以爲分後隨以金帛贖之能屬文作春秋旨義終始論及賦頌數十篇又善史書當世以爲楷則及寢病帝驛馬令作草書尺牘十首立十年薨諡曰敬子哀王基嗣永平十八年封基二弟爲縣侯三弟爲鄉侯建初二年又封基弟毅爲平望侯基立十四年薨無子肅宗憐之不除其國永元二年和帝封睦庶子斟鄉侯威爲北海王奉睦後立七年威以非重修棗陽縣志

卷之八

勳戚王侯傳

七

睦子又坐誹謗檻車徵詣廷尉道自殺永初元年鄧太后復封睦孫壽光侯普爲北海王是爲頃王延光二年復封睦少子爲亭侯普立七年薨子恭王翼嗣立十四年薨子康王嗣無後建安十一年國除初臨邑侯復好學能文章永平中每有講學事輒令復掌典馬與班固賈逵共述漢史傅毅等皆宗事之復子駒駘及兄平望侯毅並有才學永寧中鄧太后召毅及駒駘入東觀與謁者僕射劉珍著中興以下名臣列士傳駒駘又自造賦頌書論凡四篇

劉元字聖公帝族兄王莽末南方饑饉地皇二年平林人陳

牧廖湛聚眾千餘人號平林兵聖公因往從牧等爲其軍安
集掾是時光武帝及兄續亦起春陵與諸部兵合進四年正
月破王莽前隊大夫甄阜屬正梁邱賜斬之號元爲更始將
軍諸將以眾多無所統一共議立更始爲天子二月辛巳設
壇於清水上沙中陳兵大會更始卽位大赦天下建元日更
始元年九月東海人公賓就斬王莽於漸臺收璽綬傳首詣
宛十月北都洛陽申屠李松自長安傳送乘輿服御又遣中
黃門從官奉迎遷都二年二月更始自洛陽而西旣至居長
樂宮十二月赤眉西入關三年正月平陵人方望立前孺子
重修棗陽縣志

卷之八

勳戚王侯傳

八

劉嬰爲天子更始遣李松與討難將軍蘇茂等擊破皆斬之
三月遣李松會朱鮪與赤眉戰於務鄉松等大敗棄軍走時
赤眉立劉盆子更始使王匡陳牧成丹趙萌屯新豐李松軍
振以拒之九月赤眉入城更始單馬走赤眉致書曰降當封
長沙王更始遂遣劉恭請降自詣長樂宮上璽綬於盆子赤
眉坐更始於庭欲殺之劉恭謝祿爲解且固請乃封長沙王
三輔之眾苦赤眉暴虐皆憐更始張卬等謂祿曰今諸營長
多欲篡聖公一旦失之合兵攻公自滅之道也於是祿使從
兵與更始共牧馬於郊下因縊殺之帝聞之泣下詔葬於霸

陵有三子求歆鯉明年夏求兄弟與母東詣洛陽帝封求爲襄邑侯奉更始祀歆爲穀孰侯鯉爲壽光侯求後徙封咸陽侯求卒子巡嗣復徙封灌澤侯巡卒子姚嗣

城陽恭王劉祉字巨伯帝族兄春陵康侯敞之子也敞曾祖父節侯買以長沙定王子封於零道之春陵鄉爲春陵侯買卒子戴侯熊渠嗣熊渠卒子考侯仁嗣仁以春陵地勢下溼山林毒氣上書求減邑內徙元帝初元四年徙封南陽之白水鄉猶以春陵爲國名遂與從弟鉅鹿都尉回及宗族往家焉仁卒子敞嗣敞謙儉好義盡推父時金寶財產與昆弟荆

重修棗陽縣志

卷之八

勳戚王侯傳

九

州刺史上其義行拜廬江都尉歲餘會族兄安眾侯劉崇起兵王莽畏惡劉氏徵敞至長安免歸國敞卒祉以故侯嫡子行淳厚宗室皆敬之及帝起兵時祉兄弟相率從軍漢兵敗小長安祉挺身還保棘陽甄阜盡殺其母弟妻子更始立以祉爲太常將軍紹封春陵侯從西入關封爲定陶王別將擊破劉嬰於臨涇及更始降於赤眉祉乃閒行亡奔洛陽是時宗室唯祉先至帝見之歡甚封爲城陽王賜乘輿御物車馬衣服追謚敞爲康侯十一年祉疾病上城陽王璽綬願以列侯奉先人祭祀帝自臨其疾祉薨年四十三謚曰恭王竟不

之國葬於洛陽北芒十三年封祉嫡子平爲蔡陽侯以奉祉祀平弟堅爲高鄉侯建武初封祖考墓爲昌陵置令守視後改爲章陵因以春陵爲章陵縣十八年立考侯康侯廟比園陵置嗇夫詔零陵郡奉祠節侯戴侯廟以四時及臘歲五祀焉後坐與諸王交通國除永平五年顯宗更封平爲竟陵侯平卒子真嗣真卒子禹嗣禹卒子嘉嗣

安城孝侯劉賜字子琴光武帝族兄也祖父利蒼梧太守賜少孤兄顯報怨殺人吏捕顯殺之賜與顯子信賣田宅拋財產結客報吏皆亡命逃伏遭赦歸會伯升起兵乃隨從攻擊

重修棗陽縣志

卷之八

勳戚王侯傳

十

諸縣更始立以賜爲光祿勳封廣漢侯及伯升被害代爲大司徒將兵討汝南未及平更始又以信爲奮威大將軍代賜擊汝南賜與更始俱到洛陽更始欲令親近大將徇河北未知所使賜言諸家子獨有文叔可用大司馬朱鮪以爲不可更始狐疑賜深勸之乃拜帝行大司馬持節渡河是日以賜爲丞相令先入關修宗廟宮室還迎更始都長安封賜爲宛王拜前大司馬使持節鎮撫關東二年春賜就國於宛典將六部兵後赤眉破更始賜所領六部亦稍散畔乃去宛保育陽聞帝卽位乃西之武關迎更始妻子將詣洛陽帝嘉賜忠

建武二年封爲慎侯十三年更增戶邑定封爲安成侯奉朝請數蒙讌私時幸其第恩賞特嘉賜輒賑與故舊無有遺積帝爲營冢堂起祠廟置吏卒如春陵考侯二十八年卒諡曰孝子閔嗣兄子信初爲更始討平汝南因封爲汝陰王遂將兵平定江南據豫章帝卽位桂陽太守張隆擊破之信乃詣洛陽降以爲汝陰侯

成武侯劉順字平仲光武帝族兄也父慶春陵侯敞同產弟順與帝同里閔少相厚更始卽位以慶爲燕王順爲虎牙將軍會更始降赤眉慶爲亂兵所殺順乃間行詣帝拜爲南陽

重修棗陽縣志

卷之八

勳戚王侯傳

七

太守建武二年封成武侯邑戶最大八年使擊破六安賊因拜爲六安太守數年帝欲徵之吏人上書請留十一年卒帝使使者迎喪親自臨弔諡曰孝子遵嗣遵卒子弇嗣弇卒無嗣國除永平十年顯宗幸章陵追念舊恩封順弟子三人爲鄉侯

順陽侯劉嘉字孝孫光武帝族兄也父憲春陵侯敞同產弟嘉少孤性仁厚南頓君養視如子後與伯升俱學長安習尙書春秋及義兵起嘉往說新市平林兵王匡陳牧等合軍而進漢之敗小長安也嘉妻子遇害更始卽位以爲偏將軍及

攻破宛封興德侯遷大將軍擊延岑於冠軍降之更始既都
長安以嘉爲漢中王扶威大將軍持節就國都於南鄭眾數
十萬建武二年延岑復反攻漢中圍南鄭嘉兵敗走收散卒
得數萬人還軍於河池嘉復與延岑連戰岑引北入散關至
陳倉嘉追擊破之更始鄧王廖湛將赤眉十八萬攻嘉嘉與
戰於谷口大破之嘉手殺湛遂到雲陽就穀李寶等聞鄧禹
西征擁兵自守勸嘉且觀成敗帝聞之告禹曰孝孫素謹善
少且親愛當是長安輕薄兒誤之耳禹卽宣帝旨嘉乃因來
歛詣禹於雲陽三年到洛陽從征伐拜爲千乘太守六年病

重修棗陽縣志

卷之八

勳威王侯傳

三

上書乞骸骨徵詣京師十三年封爲順陽侯秋復封嘉子廕
爲黃李侯十五年嘉卒諡曰懷子參嗣

平望侯劉毅北海靖王子也初封平望侯永元中坐事奪爵
毅少有文辯稱元初元月上漢德論并憲論十二篇時劉珍
鄧耽尹兌馬融共上書稱其美安帝嘉之賜錢三萬拜議郎
劉珍字秋孫一名寶南陽蔡陽人也少好學永初中爲謁者
僕射鄧太后詔使與校書劉騶馬融及五經博士校定東
觀五經諸傳記百家藝術整其脫誤是正文字永寧元年太
后又詔珍與騶駘作建武以來名臣傳遷侍中越騎校尉延

光四年拜宗正轉衛尉卒官著誄頌連珠凡七篇又撰釋名三十篇以辯萬物之稱號云

樊重字君雲光武帝外祖周仲山甫封於樊因氏焉後徙邑北七十里之湖陽鎮爲鄉里著姓善營產業有田三百餘頃廬舍園林陂池牧畜富擬封君母畏雷重爲石室以避之性好施予遠近稱善推爲三老年八十餘終帝少受恩育及赴長安齋送甚厚建武十八年追封爲壽張敬侯詔立廟置吏奉祠車駕南巡禮其墓子宏字靡卿少有志行王莽末義兵起帝伯兄續與族兄賜將兵攻湖陽不下賜女弟爲宏妻因

重修棗陽縣志

卷之八

勳戚王侯傳

三

收擊軍將欲殺其妻子長吏相謂曰樊重父子禮義恩德行於鄉里雖有罪不可殺遂得免更始立欲以宏爲將宏辭歸與親屬作營塹自守老弱歸之者千餘家時赤眉賊掠唐子鄉多所殘殺惟稱宏仁厚引兵去帝卽位拜光祿大夫次三公建武五年封長羅侯十三年封弟丹爲射陽侯兄子尋元鄉侯族兄忠更父侯十五年定封宏壽張侯宏爲人謹慎不求苟進常誡其子曰富貴盈溢未有能終者天道惡滿而好謙前世貴戚皆明戒也宗族化之無犯法者及病車駕臨視畱宿問所欲言宏頓首曰臣無功享食大國誠恐子孫不能

保全以負厚恩願還壽張食小鄉亭帝爲之垂泣二十七年卒遺囑薄葬以爲棺藏不宜復見見有腐敗大傷人子之心令與夫人同墳異藏帝善其言書示百官曰今不順壽張侯意無以彰其德且吾日後欲以爲式賻錢千萬布萬匹諡曰恭車駕親送葬子儵嗣儵字長魚謹約有父風事後母至孝及卅卒哀毀不能支帝嘗遣中黃門朝暮送饘粥服闋就侍中丁恭受公羊巖氏春秋建武中諸王各招引賓客以儵外戚爭遣致之而儵清靜自保無所交結及沛王輔事發貴戚子弟多見收捕儵以不豫得免永平元年拜長水校尉與公重修棗陽縣志

卷之八

勳戚王侯傳

古

卿雜定郊祠禮儀以識記正五經異說北海周澤琅琊承宮儵皆致之於朝上言郡國舉孝廉率取年少能報恩者耆宿大賢多見廢棄宜勅郡國簡用良俊又議刑辟宜須秋月以順時氣顯宗並從之二年以壽張國益東平王徙封儵燕侯其後廣陵王荆有罪帝詔儵與羽林監南陽任隗雜理其獄事竟奏請誅荆引見宣明殿帝怒曰諸卿以我弟故欲誅之卽我子卿等敢爾耶儵對曰天下者高帝之天下非陛下之天下也春秋之義君親無將將而誅焉是以周公誅弟季友鳩兄經傳大之臣等以荆屬託母弟陛下聖心加惻隱故請

耳如令陛下子臣等專誅而已帝歎惜良久儵益以此知名其弟鮪爲子賞求楚王英女敬鄉公主儵聞而止之曰建武時吾家並受榮寵一宗五侯時特進一言女可以配王男可以尙主但以貴寵過盛卽爲禍患故不爲也且爾一子奈何棄之於楚乎鮪不能從十年病篤帝遣小黄門張音問所遺言先是河南縣亡失官錢典負者坐死罪徙者多委責於人以償其耗部吏因緣爲姦又野王歲獻甘醪膏錫每滋擾累儵欲奏罷而未果因音問並上以聞帝聞甚甚勅二部卽罷之卒諡曰哀長子汜嗣以次子彬楚爲郎後楚事發帝追念重修棗陽縣志

卷之八

勳戚王侯傳

五

儵之謹恪又聞其止鮪婚事故其諸子得不坐焉初儵剛定公羊嚴氏春秋章句世號樊侯學教授門徒前後三千餘人弟子潁川李修九江夏勤皆爲三公馬武字子張世居湖陽鎮少時避讎客江夏王莽末竟陵西陽三老起兵於郡界武往從之遂與漢軍合世祖破王尋拜爲振威將軍擊尤來五幡賊武常爲軍鋒力戰屢有功帝卽位以武爲侍中騎都尉封山都侯建武四年與虎牙將軍蓋延等討劉永六年與建威大將軍耿弇西擊隗囂漢軍不利囂追急武以精騎殿後擊殺數千人囂兵乃退十三年將軍

北屯下曲陽備匈奴定封爲陽虛侯二十五年以中郎將將兵擊武陵蠻顯宗初西羌寇隤右敗軍殺將復拜武捕虜將軍與竇固王豐陳訢將四萬人擊之於金城浩疊羌率眾引出塞武復追擊大破之振旅還京師增邑七百戶永平四年卒子檀嗣

馮魴字孝孫亦湖陽鎮人王莽末四方潰畔魴聚賓客招豪傑作營壘以待時湖陽大姓虞都尉與同縣申屠季有仇殺其兄謀滅季族季亡歸魴魴送季還營道逢都尉弟長卿魴曰季以窮歸我雖無素當以死任之與俱歸魴自是爲邑所重修棗陽縣志

卷之八

勲戚王侯傳

夫

敬信是時四方之士擁兵矯稱者甚眾唯魴自守兼有方略能據營自固帝聞而嘉之徵詣行在見於雲臺拜虞令遷邾令後車駕西征潁川邾城賊延褒等圍縣舍魴率吏士禦之旬日矢盡城陷魴僅以身免帝聞變馳回赴潁川褒等聞帝至將其眾請罪帝以褒等付魴皆稽頭曰今日受誅所無恨魴曰汝知悔過乎請赦之後每有盜賊並爲褒等所發無敢動者境內以平遷魏郡太守又入代趙熹爲太僕中元元年從東封岱宗行衛尉事還代張純爲司空賜爵關內侯二年帝崩使魴持節起原陵更封楊邑鄉侯永平七年代陰嵩爲

執金吾魴性矜嚴公正在位數進忠言多見納用十五年東
巡郡國畱魴宿衛南宮建初三年以老病乞身肅宗許之元
和二年卒子柱嗣曾楊邑鄉侯尙顯宗女獲嘉長公主少爲
侍中以恭肅謙約稱永元六年南單于安國從弟子逢侯率
叛胡亡出塞柱爲越騎校尉與任尙大破逢侯追擊復破之
八年南匈奴右溫禺犢王叛爲寇柱與度遼將軍龐奮追討
斬之位至將作大匠卒子定嗣官至羽林郎將定弟石襲母
公主封獲嘉侯亦爲侍中後代楊震爲太尉

棗邑爲古春陵郡漢世祖發祥之地縣南四十里之吳家

重修棗陽縣志

卷之八

勳戚王侯傳

七

店卽所謂白水村也一時天潢繁衍若趙孝王齊武王誼
屬宗支生同里閉義兵之起子弟從龍者七八千人卽泗
水安城諸王侯不得謂非春陵靈秀也他若樊氏係世祖
外家馬馮皆當時名將史策所載籍隸湖陽今在河南唐
縣其地與縣之湖河鎮連界去縣城僅七十里當年疆域
所分屬春陵與否未可指實要之江河喬嶽原非一地可
私而景星慶雲爭以先睹爲快爰卽後漢書志並舊志所
存節錄爲列傳附於世祖本紀之後

漢名人列傳

後漢三國附

劉雋章陵人受經於太尉劉寬能卒其業爲及門所推許寬歿門人追思師訓立碑於墓蓋雋爲之倡云

劉訢章陵郡人爲五官掾延熹六年桐柏淮源廟成訢以南陽守躬祠淮廟事

樂茂蔡陽人官主簿延熹中郡人劉訢躬祠淮廟茂分理其事桐柏淮源廟碑記茂得書名焉

錢訢章陵人爲廩犧令漢故中常侍州輔碑陰題名

何顯字伯求南陽襄鄉人也少遊學洛陽伯求雖後進爲郭泰賈彪所聲稱陳蕃李膺亦皆與之善由是名顯太學友人

重修棗陽縣志

卷之八

漢名人列傳

八

虞偉高有父讎未報篤病伯求往候之偉高泣訴伯求感其義爲復讎以頭醜其墓陳李之敗伯求與蕃膺俱爲宦官所陷乃變姓名亡匿汝南間所至親其豪傑袁紹慕之私與往來結爲奔走之友是時黨錮事起天下多罹其難伯求常私入洛陽從紹計議其窮困病厄者爲求援救有被掩捕者多方使得逃隱全免者甚衆及黨錮禍解伯求辟司空府每三府會議莫不推伯求之長累遷北軍中侯及董卓秉政逼爲長史託疾不就乃與司空荀爽司徒王允等共謀誅卓會爽薨復與侍郎荀攸議郎鄭泰侍中种輯越騎校尉伍瓊等謀

之事垂就而覺及攸同被收繫獄伯求自殺初伯求見曹操歎曰漢家將亡安天下者必此人也操以是嘉之嘗稱潁川荀彧王佐之器及彧爲尚書令遣人西迎叔爽并致伯求屍葬於爽冢之傍

謝該字文儀南陽章陵人也善明春秋左氏爲世名儒門徒數百千人建安中河東人樂詳條左氏疑滯數十事以問該皆爲通解之名爲謝氏釋行於世仕爲公車司馬令以父母老託疾去官會荊州道梗不得歸鄉里少府孔融上書薦之詔卽徵還拜議郎以壽終

重修棗陽縣志

卷之八

漢名人列傳

九

鄧義章陵人建安初爲荊州牧劉表治中時天子都許表雖遣使貢獻然北與袁紹相結義力諫表曰內不失貢職外不背盟主此天下大義也治中獨何怪乎義以其言不見聽辭疾而退終表之世不仕後隨劉琮入許官侍中

宋忠

一作衷

字仲子南陽章陵人爲荊州牧劉表五業從事表

以州界羣寇旣盡乃起立學校博求儒術使忠及綦母闔等撰立五經章句謂之後定書成表嘉之表卒子琮代立曹操南征琮乞降令忠詣昭烈宣旨是時操在宛昭烈大驚駭謂忠曰卿諸人作事如此不早相語今禍至方告我不亦太劇

乎引刀向忠曰今斷卿頭不足以解忿大丈夫恥臨別而殺卿耳遣之去忠遂隨琮降操操以忠爲侍中與鄭元齊名時謂北海鄭元南陽宋忠所著有世本四卷注有周易十卷揚子法言十三卷揚子太元經九卷

論曰一鄉一邑之士求其體用兼備卓越古今者代無幾人苟能明大義崇氣節亦所謂難能可貴者也棗邑爲世祖故里流風所被賢哲挺生劉焦劉訢樂茂錢訢諸人畱姓字於殘碑斷碣好古之士能識之至何伯求以謀卓見收謝文儀以親老辭官風節矯矯榮辱不驚洵足流光史冊矣他若鄧重修棗陽縣志

卷之八

漢名人列傳

三

治中宋從事皆臣事劉表終以降曹出處進退之義似有缺焉而要其通達治體湛深經術皆一時之秀也豈委瑣齷齪拘文牽義者所可同日而語哉

宋名人列傳

孟宗政字德夫其先絳州人祖安嘗隸武穆王岳飛軍立戰功父林從軍至隨州棗陽遂家焉宗政少雄偉有胆畧開禧二年金人犯襄郢宗政率義士據險要擊奪其輜重宣撫吳獵奇之補承節郎趙方吳柔勝皆薦其才轉京西鈐轄駐劄襄陽嘉定十年金人寇襄陽宗政與扈再興陳祥躒血以戰

金兵敗走尋報棗陽圍急宗政午發峴首遲明抵城馳突如神金人駭遁趙方大喜令權知棗陽軍初視事一僕犯令立斬之軍民股栗益築堤積水修治城堞簡閱軍士十一年完顏賽不率步騎圍城宗政與扈再興合兵拒守歷三月大小七十餘戰身先士卒金人戰輒敗忿甚盛兵薄城宗政隨方力拒適隨守許國援師至白水鼓聲相聞宗政率諸將出戰金人奔潰賜金帶轉武德郎十二年金帥完顏訛可復擁步卒來攻宗政囊糠盛沙以覆樓棚列甕澆水以防火募砲手擊之一砲輒殺數人金人選精騎二千號弩子手擁雲梯天

重修棗陽縣志

卷之八

宋各人列傳

三

橋先登又募鑿銀礦石工晝夜埒城運茅葺直抵圍樓下欲焚樓宗政先燬樓掘深坑防地道剗戰棚防城隕穿窬才透卽施毒煙烈火鼓鞴以熏之金人窒以濕氈析路以剗土城頽樓陷宗政撤樓益薪架火山以絕其路列勇士以長鎗勁弩備其衝距樓陷所數丈築偃月城表百餘尺翼傅正城金人摘強兵披厚鎧氈衫鐵面而前又濕氈濡革蒙火山覆以冰雪擁雲梯徑抵西北圍樓登城城中軍以長戈椿其喉殺之敢勇軍自下夾擊金兵墜死燎焰相持數月會扈再興自唐鄧還攻金人宗政自城中出擊內外合勢士氣大振賈勇

入金營自晡至夜半殺傷殆盡奪印十有六紐訛可棄帳走
獲輜重牛馬萬計升武功大夫兼閤門宣贊舍人十三年金
兵迫湖陽制置司檄宗政圖之一鼓而拔擒其千戶趙興兒
燔積聚填營寨俘掠以歸金人自是不敢復窺襄陽棗陽尋
代許國爲荆鄂都統制仍知棗陽軍事宗政以敵屢迫濠而
陳乃於西北濠外瀦水爲濘以限敵騎中原之民來歸者不
可勝紀皆發廩以贍初屋與居籍其壯勇二萬餘人號忠順
軍俾出沒唐鄧間由是威震境外金人呼爲孟爺爺轉右武
大夫團練防禦使以病疽卒邊人痛哭罷市三日子四人長
重修棗陽縣志

卷之八

宋名人列傳

三

環理宗朝累官至湖北安撫副使嘉熙元年元兵渡萬州湖
灘施夔震動環調金鐸一軍迎拒於歸州大垵砦得捷於巴
東遂復夔州其練習兵事時以爲有父風云
孟珙字璞玉宗政次子嘉定十年金人犯襄陽駐團山宗政
禦之珙料其必攻樊城獻策由羅家渡濟河翼日諸軍臨渡
布陣金兵果至半渡伏發殲其眾時棗陽圍急宗政星夜往
援臨陣父子相失珙望敵騎中有素袍白馬者曰必吾父也
急麾騎突陣遂脫宗政十二年完顏訛可率步騎二十萬攻
棗陽宗政命珙取間道劫金營破砦十八斬首千餘級大俘

軍器以歸制置使趙方奇之辟光化尉轉京西第五副將初宗政招唐鄧蔡壯士二萬餘人號忠順軍命江海總之眾不安制置使以珙代海眾乃帖服紹定元年珙勅平堰於棗陽自城至軍西十八里由八壘河經漸水側跨九阜建通天槽八十有三丈溉田十萬畝立十莊三轄使軍民分屯是歲收穀十萬石又命忠順軍家自畜馬官給芻粟馬益蕃息五年升京西兵馬鈐轄六年元將追金主守緒逼蔡朝命檄珙討金唐鄧行省武仙以時順陽與唐州守將武天錫鄧州守將移刺瑗犯光化軍鋒甚銳珙往逼天錫壘一鼓拔之斬天錫

重修棗陽縣志

卷之八

宋各人列傳

三

俘其將士得戶十三萬有奇武仙敗走馬蹬山獲其輜重畜牲不可勝計金守將多以城降移刺瑗遣使請降珙納之爲易衣冠以賓禮見於是降者相繼珙因其鄉土而使之耕因其人民而立之長少壯者籍爲軍才能者分以土地任以職事七月武仙愛將劉儀領壯士二百降珙問仙虛實儀言仙所據九砦其大砦石穴山以馬磴沙窩岵山三砦蔽其前若破離金砦則岵山沙窩孤立而石穴亦可圖矣珙乃遣兵攻離金盧秀執黑旗率眾入大呼縱火掩殺幾盡是夜壯士楊貴等擣王子山砦護帳軍酣寢王建入帳中斬金將小元帥

首遂圍馬蹬遣樊文彬攻其前門成明等邀截西路砦火燭
天殺戮山積逸去者復爲成明伏軍所得師還至沙窩西與
金人遇復大捷未幾丁順又破黠侯里砦珙召儀曰此砦旣
破板橋石穴必震汝能爲我招之乎儀請選婦人三百僞逃
歸懷招安榜以往招降金將及金軍五千人珙料武仙必登
岵山窺伺乃合樊文彬駐軍其下已而仙眾果登山及半文
彬麾旗伏兵四起仙眾失措枕籍崖谷山爲之赭殺其將兀
沙惹薄暮珙進軍至小水河劉儀還言仙謀往商州然老穉
不願北去珙曰進兵不可緩夜漏十刻召文彬等受方略幕

重修棗陽縣志

卷之八

宋各人列傳

十四

食啓行時積雨未霽文彬患之珙曰此雪夜擒吳元濟時也
策馬直至石穴分兵進攻自寅至巳九砦俱破仙走追及於
鮎魚砦仙望見易服而遁降其眾七萬獲甲兵無算還軍襄
陽轉鄂州江陵都統制元遣宣撫王檝約共攻蔡制置使謀
於珙珙請以二萬人往奔蓋喜約爲兄弟金人自東門出戰
珙遮其歸路掩入汝河擒其偏裨八十七人進逼石橋奪柴
潭樓蔡人恃潭爲固外卽汝河潭高於河五六丈相傳下有
龍人不敢近珙激勵將士決之實以薪葦遂濟師攻城下令
諸軍銜枚列雲梯聞鼓則進萬眾競登戰於城上降其丞相

等官開西門招奔蓋入金主已自經殂珙與奔蓋共分其骨
振旅而歸畱屯襄陽兼忠義軍都統制頃招中原精銳之士
萬五千人分屯以備元名鎮北軍端平二年移屯黃州上問
恢復對曰願陛下寬民力畜人才以俟機會問和議對曰臣
介冑之士當言戰不當言和至黃增陴浚隍蒐訪軍實民來
歸者厚加賑貸三年元將寇襄陽荆隨郢復陷江陵危急珙
受檄應援先遣張順渡江自以全師繼之竟破元二十四砦
嘉熙元年封隨縣男擢中州團練使兼知江陵二年加京湖
制置使受詔收復荆襄珙謂必得郢然後可以通餽餉得荆
門然後可以出奇兵遂召諸將指授方畧發兵深入所至以
捷聞是年復郢州荆門三年復信陽軍遂復襄陽十二月元
遣大將塔海并雪帥師入蜀號八十萬珙遣將分屯設策備
禦遂復夔州四年拜寧武軍節度四川宣撫使兼京湖安撫
制置使至鎮招集散民爲寧武軍釐蜀政之弊爲五條班諸
郡縣淳祐二年蒙古復寇蜀珙分兵禦之下令飭戍主兵官
不許失棄寸土權開州梁棟以乏糧還珙曰是棄城也斬以
徇由是諸將稟命維謹拜檢校少保進封漢東郡公五年移
鎮江陵登城嘆曰江陵所恃三海今變爲桑田自城以東直

至三汊無所限隔敵一鳴鞭可至城外乃修復內隘十有一別作十隘於外漳水舊自城西入江因障而東之俾繞城北入於漢三海遂通爲一隨高下爲蓄泄三百里間渺然巨浸遂爲江陵天險土木之工百七十萬民不知役繪圖上之乞歸不允六年薨於江陵府治時九月戊午也其前夕大星隕於境內聲如雷大風發屋折木帝震悼輟朝贈太師追封吉國公諡忠襄廟曰威愛珙生平忠君體國之念貫金石在軍中與參佐部曲言事意有不合徐以片言折衷衆志皆愜謁士遊客老校退卒一以恩意撫接建旗鼓臨將吏面色凜然

重修棗陽縣志

卷之八

宋名人列傳

三

無敢涕唾者退則掃地焚香隱几危坐若蕭然事外遠貨色絕滋味邃於易六十四卦各繫四句名警心易贊三弟瑛季弟璋皆任兵官嘉熙元年元兵欲大舉臨江珙策其必道施黔以窺湖湘使瑛以精兵五千駐松滋爲夔萬聲援又招集沿淮經戰之士得數萬人號武寧軍使璋領之增置營壘分布戰艦出精兵駐澧州防施黔路夔州之復瑛璋均與有力焉子之經任策應都統兼知江陵事

節錄宋史本傳通鑑綱目並襄陽府志

論曰孟氏爲南宋將門宗政之先嘗隨岳武穆王立戰功宗政起家里豪出沒疆場間未嘗學兵法而暗與之合及權棗

陽軍事與金人相持前後七十餘戰斬將奪印力破敵膽致呼爲孟翁翁而不敢名威亦振矣有子四人皆以武功顯而次子珙繼知棗陽軍請剏平堰溉田收穀澤惠無窮料敵出奇制勝尤有父風柴潭之役與奔蓋合眾攻金大戰於城上降其丞相等官遂使金主經殂分其骨振旅而歸雖中原未能恢復亦南渡後第一快事也史言宗政父林從武穆軍至隨州棗陽遂家焉里閭所居棗與隨皆不能詳其處而守戰之事蓄洩之謀見於棗邑爲多卽謂河嶽英靈鍾毓此邦春陵人士正可景仰前徽以爲桑梓之敬恭云爾

重修棗陽縣志

卷之八

宋名人列傳

七

元名人列傳

元 滕克恭字安卿其先棗陽人宋季流移於祥符之迷回村依富室高氏勤學好問博通經史尤精於詩仕元累官至集賢院直學士後避地錢塘與楊廉夫相友善詩律清婉南州人士多傳誦之

明名人列傳

明 尚冕字從周少有才名登天順八年進士歷官刑部郎中熟諳法律國家每有大獄冕裁決如流爲同官所畏忌遂告歸以文酒自娛所著詩有盛唐遺音遠近多傳誦焉

王琰字良璧成化進士授行人陞監察御史巡撫蘇松吳地號難劇琰竭慮周諮巨奸宿蠹剔除幾盡宦况清苦人所不堪後以直諫廷杖死棺衾不備合臺賻之始克葬孫一鶚自有傳

袁盛字德昌號桐岡中景泰七年舉人由知縣遷保定府同知歷官貴州黎平府知府有善政苗民土官咸尸祝之長子仕字良輔宏治六年進士由河南封邱縣知縣行取河南道監察御史巡按廣東彈劾不避權貴總持風紀丰采凜然以言事忤劉瑾矯旨廷杖左遷襄王府長史次子傳官通判傳

重修棗陽縣志

卷之八

旣名人列傳

五

子廷英字光輔嘉靖四年舉人官陝西商州知州居官清正年五十卽致仕隱居紫玉山以吟咏自娛終歲不入城市三子偉字子俊正德時拔貢任雲南左衛知事工詩善畫下筆有奇氣屢試不第以下寮終士林惜之子峻如歲貢生目下十行於書無所不讀其抗直端方共推爲不愧繼武云

袁端字表正成化十七年進士歷官南臺御史巡視糧儲管理京營剔弊除奸性剛直屢忤權貴中貴汪直以事中之逮下詔獄幾死旋赦出爲永安經歷端處之泰然無怨尤色久之遷溫州府知府

王一鶚字雲衢嘉靖三十三年進士官至兵部尙書萬曆時門禁久弛衛軍役於中官卒伍多缺每遇簡閱恆賃市兒乞丐以應义刀紅盛日出始一入直直廬常虛將官多納月鏹於所轄凡提號走更巡城諸事皆廢一鶚甫至部卽申其禁明年詔定邊臣考績法一鶚與其議九月加太子少保平九年春遼東總兵李成梁使副將李寧襲板升於鎮夷堡獲老弱二百八十餘級師旋爲別部所遮寧先走將士數千人失亡大半巡按御史胡克儉馳疏劾寧一鶚置寧罪不議克儉大憤並詆一鶚於是一鶚挂物議賴考功郎中陸光祖力雪重修棗陽縣志

卷之八

明名人列傳

无

之時經略鄭洛與韃靼議和一鶚主之爲兵部都給事中張棟所劾一鶚不與辨遽上疏求解任是年八月卒後徙家廣西之周曲焉

劉海字滙川宏治間歲貢生正德七年流寇趙燧等率眾十三萬騎五千由唐縣攻掠襄隨轉攻棗陽官民恐懼欲棄城走海拔刀斷案誓以必守眾皆讐服城賴以全事平授黃巖縣縣丞

楊宏載明季諸生流寇之亂築壁塢阻水爲固以保鄉里順治初年徵求隱逸邑令柯聳薦之稱其孝友克家忠勤勵俗

宜飭蒲輪之典用彰珍席之儒不就終於家子桂臣由拔貢官柳州府知府多惠政邑人嚴繩光稱之曰長往邈而不追安排宵而無悶宏載有焉

嚴繩光字羽宜由拔貢生官江西湖西道僉事從左良玉恢復萍鄉萬載等縣甲冑行間親冒矢石兵部李猶龍上其功順治二年大兵定江西遂棄職歸邑令柯聳謂其學擅儒宗才堪命世宦途所至惠問昭然薦之亦不起十八年往遊南嶽卒於漢陽縣訓導弟紹光學署

錢積中字彥華大學生任廣西賓州判官州雜民夷風俗獷

重修棗陽縣志

卷之八

明名人列傳

三

悍積中至以禮讓化導人始知學歲苦猺獞擄劫乃率州兵及家人子弟躬冒矢石勦平之擢本州知州在任十八年懇辭而歸州人立生祠於城南清風樓下歲時致祭焉

論曰世稱江漢炳靈生人多奇偉棗邑地近漢江在漢爲春陵郡青山白水鍾毓良多不獨世祖勲戚上應列宿者也元承南宋之季舊志所載惟滕克恭一人有明以來英賢輩出侍御王琰大司馬王一鶚正色立朝扶忠剔奸祖孫濟美聲施於今維烈袁李並多才俊而李端袁仕皆以臺憲忤中貴受廷杖蹇蹇諤諤百折不回仿之昔賢殆孝肅剛峯之流亞

歎他若尚冤以明哲著刑曹劉海以守禦安里閔袁盛袁傅
錢積中又皆尸頌尸祝懋著循良其與楊宏載嚴繩光諸人
號爲學擅儒宗才堪命世者雖志趣不同要皆邦家之光鄉
里之儀型也謹參稽各志列傳其事於左

國朝

袁煥字蔚每號參嵐邑北雙河鎮人少穎悟好學通經史尤
曉暢兵事年十五應童子試邑令管勗登奇其才首拔之每
語人曰使斯人生建安時亦王粲陳琳之亞也太守唐梅臣
修意中亭大集名流舉觴屬作記煥援筆立就是時座客若

重修蕪陽縣志

卷之八

明名人列傳

三

竟陵譚元春者亦爲擱筆煥由是知名崇禎癸酉壬午兩中
副車官長沙攸縣教諭流賊張獻忠陷湖南棄官僑居武昌
宏光卽位江南煥以國恥未雪不宜遽正尊號且江南所恃
者長江而長江又以江北爲藩籬不守江北長江亦不足恃
乃爲監國表及長江戰守議以諷當路而時方偷安莫能用
也順治二年察舉遺佚以煥爲江夏縣知縣蒞事數載甚有
名稱職滿當遷解組歸里開別業於東山著書以終有鹿門
草續蟬吟二陟堂詩古文集藏於家

李綦崇禎己卯科舉人順治四年徵求隱逸邑令柯聳薦之

謂其粹品宏才清標峻節授鳳陽府同知以母老辭歸終養
子其丹歲貢生任保康縣訓導教諸生有法子六人四膺歲
薦二食餼乾隆丁卯舉人爲柯其孫也壽八十餘終著有重
彩堂詩集

劉佐明字公亮順治戊子拔貢補太原府經歷署懷仁縣事
懷仁古雲中地當夷夏之衝經流寇蹂躪城郭邱墟復以驛
路騷擾賦役殷繁民多輕去其鄉佐明至招流亡剔吏蠹均
夫役人賴以安大吏察其勤廉擢浙江石門知縣有惠政縣
試以呂葆中爲首鍾朗次之後呂大魁天下鍾人詞林時多

重修棗陽縣志

卷之八

國朝名人列傳

三

其知人子四人鑑歲貢生鈔庠生鏞康熙乙丑科拔貢生鈞
廩生

錢民賑順治戊子拔貢生任大同府通判地近塞外凋敝已
甚民賑佐郡守分理撫輯多所保全解組歸時兩袖清風而
已

唐亮字寅之明季避亂爲賊所獲抗志不屈賊囚之幽室中
將加刃亮以老母無人奉事晝夜啜泣賊母聞而義之資以
路費使還家順治初年以文學舉明經邑宰柯聳重其品學
時與往還延訪利弊講論詩古文相得甚懽劉公嗣煦修邑

志亮分校焉

史大經字冠五少習儒業因父母早世遂廢讀循例貢成均以家事自任俾兩弟專心誦讀族兄永錫貧無立錐收與同爨督課其子光第入泮更爲授室待之如子婦從伯某豐於財身故無子族人蕩其產畧盡嗣續幾絕大經分產與弟使承禋祀有從妹適劉氏家赤貧夫亡無子矢志大經贍養之並具奩嫁其五女里黨義之子光宗監生立爲弟宗國後次光榮次光曜俱廩貢生光曜字寅仲由縣庠貢成均居家孝友然諾必信尤好施予貧士無力誦讀者多解囊相助歲

重修棗陽縣志

卷之八

國朝名人列傳

三

暮常備錢米以待窮乏嘉慶丁卯歲大饑冬暮大雪同里某一家數口僵臥待斃探之絕粒已二日矣急以糧饋之其存心濟物多類此年五十尙無子後連舉四男人以爲積德之報云光曜仲兄光榮有子登儁亦善守家型性穎敏有幹濟才邑中事多借箸焉年十八登乾隆丁酉選拔任黃梅縣教諭以軍功擢甘肅通渭縣知縣時陝甘教匪未靖登儁隻身赴任外辦軍需內理簿書竟以勞瘁卒身後囊橐蕭然同官協助櫬始得歸

賀起龍王子禮者棗陽縣冊書也順治初軍需孔亟免荒徵

熟不分上中下每畝派糧三升起龍等具呈大府畧曰棗陽之民以十計流寇處劉去其五道路流亡去其二今所存以貢賦稅供奔命者僅十分之三耳以三分殘子之民輸十萬荒蕪之稅賦役出於是軍需出於是帶荒之徵已不堪命矣近派加遼餉復倍於正額民將何以爲生乎大府廉其實爲奏免自後遼餉不復加徵

胡步峩字雪輦父來瑞以諸生教授里中品資端厚人欽重之年九十七無病而終步峩篤志於學食餼郡庠幼時來瑞爲聘張廷彥女及笄目雙瞽廷彥恐不能爲壻家主中饋議

重修棗陽縣志

卷之八

國朝名人列傳

三

退婚步峩聞之謂父曰不可兒旣與張氏結婚緣分已定兒目倘瞽彼女詎可舍而他適乎背盟不義違天不祥父聞大悅遂娶焉女父感其義重貲覓一婢媵之步峩弗納夫婦和好終身生三子皆賢孫芳桂列庠序

邱本彥邑之東北鄉人嘉慶癸酉甲戌歲荐饑冬復大雪本彥捐麥以濟饑購衣以濟寒全活甚眾西北邊境少木薪皆取之桐柏山中山徑陡削有闔王壁擁腰石天橋石梯諸險稍失足輒顛蹶乃捐貲鑿險且紆其塗樵採便焉又於隨棗通衢平治車路建亭施茶以利行人子茂芳承父志踵而行

之

論曰人之號爲不朽者曰立德曰立功曰立言其所樹立雖有大有小而信今傳後可以不朽一也棗邑代有聞人

國朝雅化覃敷率土咸被肇造之初袁煥以副車上疏江南觀其辯尊號議戰守淹通經史曉暢兵事論正辭偉直與治安諸策相上下不僅名高建安爲王粲陳琳之亞也李綦粹品宏才清標峻節佐鳳陽以循良著聲已開劉佐明錢民賑史登儁之先矣他若唐亮事母至孝而賊不忍害史大經孝友居家而德重鄉里澤衍子孫易曰積善餘慶二子有焉至

重修棗陽縣志

卷之八

國朝各人列傳

三

賀起龍王于禮身充冊書胡步菽邱本彥人本布衣而皆樂善好施見義必爲雖表見無多要皆立德立功立言之一端也卽流傳人口之事以名爲不朽又誰曰不宜哉

孝義忠勇列傳

明 王雲鳳字朝陽性至孝家雖貧而蓄旨甘承色笑事母能致其所欲宏治中貢太學旋歸養母歿摧毀骨立廬墓三年有靈芝數本產於其墓人以爲孝行所召云

錢朝用少孤貧事母哀以孝聞母病醫不得其腠理使辨穢之甘苦以定方藥朝用如醫言母病果瘳丙子科赴秋闈主

司置其卷者再忽夢人告曰此孝子某之卷也凌晨索其文觀之甚愜遂領鄉薦謁選京師母寄詩云肝腸寸寸爲兒裂空隔雲山幾萬層朝用得詩卽日襍被南歸

李紹先字復溪少孤事母孝母病與妻晝夜侍側衣不解帶歷久無倦容萬厯中以歲貢授湖州通判年八十餘病篤以俸餘付子曰將此爲他日修祖母節坊費言訖而終

牛九宿字虎溪少不羈一時才名藉甚由拔貢生任昌平州知州有善政以時事多艱解組歸里崇禎十五年十二月李自成陷襄陽據之分兵寇棗陽知縣郭裕誓眾守城九宿慷慨

重修棗陽縣志

卷之八

孝義忠勇傳

三

慨登陴督鄉兵血戰十六年正月朔城破死之

錢世璧邑廩生崇禎十六年元旦流賊破棗陽世璧約同社友護守文廟眾皆竄伏無一應者世璧挺立大成門外指賊大罵賊怒殺之甚慘順治中廣文周九華夜夢一丈夫衣冠偉然立於前曰吾明季諸生錢世璧也公不聞吾癸未之事乎周覺而驚次日詢於眾咸嘆異之

李藻邑庠生崇禎十六年流賊破棗邑以守城死無子妻趙氏亦守節邑人公請於上爲旌其門

國朝 張嗣騫十歲喪父家無擔石儲事母以孝稱母嘗病

鬻芻於市以供藥餌需少長爲學深自刻勵補邑諸生文行兼優邑令徐公有儒林碩彥之褒適大水壞城人民乏食嗣爲典鬻私業周卹之生平好行其德類如此

賀方騰邑庠生事母孝養兼盡母病危方騰泣禱於神願減已算以益母母病旋愈後十餘年母歿柩停未厝一日烈風暴雨椽瓦飛揚方騰懼驚母靈伏棺痛哭瓦墮碎首漉血漬棺不忍去頃之風雨頓止論者比之泣墓之王哀云

李悅邑庠生事繼母極孝藜羹菽水必得其歡心生平讀書雅重名節慎交游雖貴顯不敢干以非禮終歲戶庭闐然所

重修棗陽縣志

卷之八

孝義忠勇傳

三

與過往惟一素心言修身勵行之事無他及也

史名彥字樂敘大經孫也邑廩生舉明經幼失怙恃繼母萬撫之成立事萬極盡孝養萬老壽善病名彥躬侍藥餌不離左右行年七十孺慕不衰遠近以純孝稱

劉鐸字鳴萬至性過人事母孝養備至未嘗遠遊會以鄉試歸離家尚十餘里聞母歿嘔血斗餘慟絕復蘇弟銳早卒撫孤成立屢試不第以歲貢終江陵訓導

劉崑字魯瞻少孤讀書皆母口授性至孝立行尤方梗由廩膳生官隴西縣知縣興利除弊不辭勞瘁歿後邑人以懿行

請於上得祀鄉賢祠兄銘有時譽弟圖以孝聞嘉慶二年教
匪滋事岡奉祖母避難山谷間行數百里兩肩皮盡脫同時
有衛名時楊作棟郭凌南者其制行多相類名時居邑北湖
河鎮家故饒父食必自奉盤匱一日其父緣他事怒未息翻
食案羹爛名時手徐徐進食未嘗有楚容作棟世業農父勤
於稼穡喜牛馬有賣犢者至故昂其值作棟曲體父意隱倍
其價市得之亦養志之一端也凌南字奮之邑庠生與名時
同里事繼母能曲承其歡時人比之李悅云

羅萬年一名襄字均平縣北羅家橋人乾隆庚戌科武舉雄

重修襄陽縣志

卷之八

孝義忠勇傳

三

偉有膽略趨捷善鬪爲鄉里所讐服嘉慶元年春教匪發難
荆襄三月八日入縣西境爲梁家山鄉勇所敗退焚櫻源寺
而去於是境內戒嚴萬年率弟萬卷同增生周振宗等練鄉
兵於畢家岡會襄陽練勇攻破之二十二日賊至蘆陂堰縛
利刃牛角火燒其尾所向多潰據官莊高廟岡與襄陽雙溝
賊巢相應萬年以賊乘高難仰攻使人負薪米往來其下賊
爭相虜掠乃合璩家灣七方岡鄉兵掩擊禽賊渠劉士進等
三十餘人俄賊救至且殊死戰眾遂不支振宗等大呼陷陣
賊環攻之武生姜大定王虎臣監生高從龍皆死馬振宗潰

圍走馬陷於淖賊攢殺之萬年收集散眾退保縣城城守惟把總一員有兵十八人知縣王廷珪性過慈聞賊至輒不食一切防守悉委之記室楊開昆風聲鶴唳一夜數驚是時存亡之機惟萬年是賴越三日安襄鄖荆兵備道令千總張松林率兵來援而賊仍肆焚掠自平林店至隨陽店二十餘里市鎮俱燼五月十五日薄城燬附郭民居飛焰入城中以有備不得逞二十四日分其眾東向吳家店西向土橋舖窮鄉僻壤蹂躪幾徧城下盤踞之賊猶未退也會總統永保西安將軍恆瑞直隸提督慶成尾賊至棗陽六月十六日軍於黃

重修棗陽縣志

卷之八

孝義忠勇傳

三

龍岡西王家岡列營相望十八日昧爽恆將軍整隊而前直擣賊壘火器齊發勢如風雨軍聲大振萬年令城中呼噪應之移時賊不少退將曙慶軍門帥兵至夾擊之賊乃東南走圍解大軍分駐黃龍岡黑龍岡以休士萬年等開門迎勞將士慶軍門見而愛其驍勇令與弟萬卷附生錢捷元武生王文宰李明藻等從勦屢著戰功明年至鍾祥落花潭姚之富齊二寡婦王氏李槐等擁眾四五萬人負嶠山谷是時大兵雲集總統永自北進將軍恆在東北提督阿克東阿自宜城渡漢在西北總督明亮及總兵楊秀在南之士門冲互相犄

猶各據險要以防衝突八月中旬賊乏食李槐領眾撲總兵楊營盤我兵乘勢大進萬年以練勇獨當一隊斃賊及墮崖澗者以二萬計兵勇亦多殺傷萬年爲飛礮所中死事聞○賜恤廕次子紹瓊雲騎尉世襲罔替長子紹瑤有廢疾並給恩騎尉銜同時王名達及弟成達從軍授千總戰死恤廕俱如萬年

周振宗字克昌邑增生少豪邁精武藝逆匪之逼棗陽也振宗與羅萬年招練鄉兵至官莊與賊遇分三隊迎擊殺賊無算會賊大至眾潰敗振宗戰益力賊圍之數重猶大呼殺賊

重修棗陽縣志

卷之八

孝義忠勇傳

四

多人馬蹶泥淖中不能出賊攢殺之維時武生姜大定王虎臣監生高從龍周希點皆戰死事聞

賜恤入祀昭忠祠又有李棠者爲齊王氏所得欲亂之不可齊王氏怒支解之

劉爲熙字兆麟居縣之南石橋冲拔貢生石門知縣佐明族孫也援例貢成均性巖峻有重望嘉慶元年春教匪滋擾荆襄兵不敷徵調檄下各州縣令紳耆團練義勇以衛鄉里爲熙及弟爲燦拔貢生史名修受檄未匝月得二千入於清潭鎮導以紀律是時賊由李家樓趨車橋河將撲新集爲熙以

三百人拒於高家岡殺賊四十三人擒其魁余文龍奪獲器械甚多復令名修拒其東爲燦拒其西而自居中由新集四井岡洞兒山八萬山光斗山至石虎山橫亘五六十里互爲應援維時外寇方殷而境內石橋之賊將起矣有林玉堂者教首許正常弟子也正常死代領其眾遂爲總教首潛謀不軌匿劉可禮家約襄陽夾河州鍾祥下洋子諸賊於三月二十三日會石橋合力攻襄陽斷南北要塞爲熙偵知之與爲燦以千人掩其巢擒劉可禮等三十餘人搜獲林玉堂於地窟申得風輪卷達摩卷天圖卷黑暗卷會頭經定劫經應劫

重修棗陽縣志

卷之八

孝義忠勇傳

里

經九蓮寶讚開世寶卷骷髏寶卷五仙傳道靈文表終劫論一十三冊殊符一百二十道信香一龕補飢丸二缶天元太寶白旗二鳥鎗兵器無算解送縣城賊黨忿甚會眾萬餘渡白水河由唐家店直撲清潭清潭在棗陽東南山中距城近百里爲隨州西界要害隨之均川長岡店茅茨畷亦練鄉兵三千餘人受爲熙約束賊分兩隊一由李家樓窺新集爲熙以吳家集之眾迎擊之互有殺傷一由團山趨唐家店名修以石虎山之眾禦之爲燦率五百人截之光斗山至羅漢包與賊遇賊小創遽去爲熙謂眾曰賊去必復返宜背山阻水

爲犄犄之勢遂以千人屯東西隘口五百人屯銅牆坡趨土門高峯爲疑兵五百人屯三里岡赴老鸛山爲游徼二千人分屯太平橋龜山後以千人趨九里岡橫搗之六月十一日賊果大至由北九里岡直抵太平橋北之小山會風雨晝晦賊急退隨之鄉勇盡奔散爲熙大驚聚其父老子弟即日結隊而行越日賊復至清潭不見一人盡焚其廬舍自清潭被焚縣南市鎮幾無存者卽隨郢京宜之間亦半爲賊壘矣後六年事平當路憶其功予七品職銜不就卒以貢生終同時有高煥字燦章聞變與兄糾合鄉兵堅壁清野以待又有雙重修棗陽縣志

卷之八

孝義忠勇傳

聖

河鎮張恆亦如之賊至邑北皆無所得而去附近村舍不罹於難咸稱高張之義云
論曰孝爲百行之原曰大孝曰達孝尊養之至繼述之善非後人所可擬也人苟篤志庭闈有懷明發雖在愚賤君子躋焉至移孝作忠見義必爲極之殺身捐軀而不惜者至性過人殆不欲以戰陣無勇有忝所生耳棗邑人重氣節由明及今慕義之士大率以孝聞而慷慨登城有膽有識飛瓦碎首挺立不移孝義忠勇又何能深爲區別哉

補續

鄒廷蘭邑之蔡陽鋪人中道光壬辰武舉會試後以把總効用撫標隨師崇陽以軍功加六品頂戴兼賞藍翎升補竹山千總喫啖滋事調鄖陽鎮兵弁赴廣東浙江征剿廷蘭皆與焉咸豐元年粵西土匪猖獗廷蘭隨鄖陽總鎮赴粵接仗奮勇經都統烏保升興國州守備換戴花翎二年冬粵匪由湖南竄入北省廷蘭隨大軍追戰數千里至武昌入城與其戚艾長青遇同以忠義相勗無屈於賊迨城陷而廷蘭致命死矣艾長青亦邑人世居資山鎮道光己亥武舉効力襄陽城守營署把總事粵匪至湖南隨游擊赴省防堵分守文昌門

重修棗陽縣志

卷之八

孝義忠勇傳

五十一

城陷與賊戰受重傷其死又在廷蘭之先也

論曰死生之於人大矣必生爲奇男子而後死爲烈丈夫非冒昧以往輕生隕命已也棗邑人多忠勇羅萬年周振宗諸君子謀能制賊功在桑梓成敗存亡之機言之者每唏噓零涕廷蘭長青隨人爲進退非事權在手得自行其胸臆而勢窮力盡以死報國其視腴顏從賊偷活旦夕者何如哉昔賢有言曰文臣不愛錢武臣不惜死天下太平矣鄒艾兩人殆不惜死之流亞而可繼迹萬年振宗者歟

流寓名人列傳

晉 習鑿齒字彥威襄陽人少有志節博學洽聞以文華著稱桓溫辟爲從事累遷別駕溫出征或從或守所在任職溫覬覦非望因著漢晉春秋以裁正之凡五十四卷苻堅陷襄陽聞其名輿致焉與語大悅賜賚甚厚俄以疾辭歸寓於邑南青峯頂山下山中有石洞如屋時往來其處故至今號曰習洞云

宋 孟林絳州人父安嘗隨岳武穆王軍有戰功林從軍至隨棗因家於棗陽焉子宗政孫璟珙瑛璋皆任兵官有傳見人物志

重修棗陽縣志

卷之八

流寓名人列傳

聖

國朝 王近顛字若岩黃岡人雍正甲辰鄉薦除新野縣知縣廉幹嚴肅甚有名稱以不能附權貴落職僑寓棗陽新邑人猶時來棗餽問之學問淵博當事者聘主勺庭書院繼爲棗陽山長隨才造就引掖有方襄棗文風賴之一變年老將歸生徒挽留遂著籍焉子養輔養弼均有聲庠序

論曰詩言維桑與梓必恭敬止誠以所生之地少而習焉居而安焉室家田園之樂意真而趣永古人所以不忍輕去其鄉蓋爲此也卽或千里百里負笈他方求祿求官滯迹上國歲月所積感懷係之童時釣遊之處且有通諸夢寐而識其

山川者故士之流寓他方大抵勢有所迫而不得已耳棗邑
土風醇厚其緣事而至因以爲家者甚衆而習鑿齒王若岩
皆以鄰邑名流爲權貴所屈避地於棗至孟氏之從軍遠來
卜居卜鄰竟若適彼樂土爰得我所無復去國懷鄉之感其
與習王兩公或留或返同不同何如也昔米襄陽蓋襄陽皆
鹿門土著而少陵之淹留亦以襄陽稱若援地從主人之例
畧追述始事之辭列三公於本邑諸君子先亦誰曰不宜然
而東岱西華各有攸屬公之流寓於此亦猶麒麟在郊藪鳳
凰儀於廷鳴其盛於此邦可也

重修棗陽縣志

卷之八

流寓名人列傳

四